

Sunday, March 30, 2025

Time - 2:30pm

AGRI MINISTER

Agriculture Minister Pu C. Lalsawivunga chuan ruihhlo, mipat hmeichhiatna leh eizawna thianglim lo laka fihlim theih nan Kristian nun dan tha ngaihsan kawnga tan lak a tul tih a sawi. Tuivawl Group YMA Inkhawmpui a hmanpuinaah he thu hi sawiin Minister chuan tunlaia khawvelin a buaipui em em zu leh ruih theih thildangin mimal, chhungkua bakah khawtlang leh kohhran thlenga a tihchhiat theih thu a sawi a. Mipat hmeichhiatna hman khawlohnain Mizoram a tih buai nasat bawk thu sawiin chanchinbu leh YouTube kaltlanga eirukna laka fihlim lo leh eizawna thianglim lo kalpui thin te chanchin hriat tur a awm fo thu a sawi a. Heng laka him tura Kristian nun dan tha ngaihsan leh nunpui kawnga rinawm taka mipuiten hma an lak a tul thu a sawi a ni. Minister chuan mipuite din, kalphung thar mipui sorkar chuan kum hnihna hmang mekin theihtawp chhuahin Chief Minister Pu Lalduhoma hovin hna an thawh mek thu a sawi a. Hmasawna hna rualkhai tak leh dik taka kal pui zel an tum tlat tih a sawi bawk a ni.



MALARIA ELIMINATION

Health department hnuaia National Center for Vector Borne Diseases Control (NCVBDC) hotute chuan India ram pumah Mizoram leh Tripura chu Malaria la tam zualna a nih thu an sawi. Akashvani in a kawmnaah department hotute chuan he thu hi sawiin Mizoram leh Tripura tih loh India ram state dangteah chuan malaria chu an thunun hneh viau tawh thu an sawi a. Mizoram chhungah pawh malaria chu a ziaawm tawh hle thu sawiin hetihruah hian Mamit, Lunglei, Lawngtlai leh Siaha district te tuna malaria awm tam zualna a la nih thu an sawi a. Heng district-ah te hian a la tam deuh avangin Mizoram dinmun pawh a la chhiat phah rih thu an sawi a. District dang zawng zawngah chuan malaria tihbo kawnga sorkar laipuiin a rawn beisei ang an phak thuak tawh thu an sawi a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni. Zanin dar 6 leh a chanve-ah Chanchinthar hi puan leh a ni ang.



TAISANGA MEMORIAL STONE ERECTED

Nimin khan Champhai District a Farkawn ram chhunga awm, Lamsial Puka ruhrote hmu chhuaktu Pu Taisanga hriatrengna lung phun chu Farkawn VCP Pu Lawmzuala'n a hawng. Lamsial Puk hmu chhuaktu Pu Taisanga hriatrengna lung phun senso hi Dept. of Mizo and Cultural Studies, ICFAI University Mizoram ten tumin Farkawn Zawra Veng Branch YMA ten a tul dangte an buaipui a. Lamsial Puk hi kum 1951 vel khan Pu Taisanga ram vakin a hmuh chhuah a ni a. Lamsial rama lo awm a nih avangin a hnuaah Lamsial Puk tih a lo ni ta a ni. A hmu chhuaktu Pu Taisanga hi kum 1921-ah Farkawnah a piang a, kum 2011 January ni 23 khan Champhai Ruantlangah a boral a ni.

Lamsial Pukah hian Lu ruh, khabe ruh, ngal ruh, ban ruh leh ruh dang eng emaw zat a awm a. Heng ruhrote hi kum 1976 khan Archaeological Institute, Mumbai-ah exam tura thawh a ni a. A.I.M in an lo endik atanga a landanin Lamsial Puka ruhro awmte hi AD 1650 vela mi ni a hriat a ni a. He lai velah hian tun hmam Lamsial hnam an lo cheng tawh thin a ni. Lamsial Puka ruhro awmte hi darthlang bawmah dah that niin kumtin zirlai, Adventure Club, mimal leh pawl hrang hrang bakah ramchhung hmun dang atangtein an tlawh nasa thei hle a, ram pawn Israel atang te pawhin an

rawn tlawh tawh a. Farkawn Heritage Preservation Society te chuan uluk takin an enkawl mek a ni.



PM MODI HIGHLIGHTS GLOBAL CONCERN OVER TEXTILE WASTE IN ‘MANN KI BAAT’

Prime Minister Narendra Modi-a chuan silhfen hlui (textile waste) thehthang hi khawvel pum tan buaipui tham a ni ta a ti.

Vawiina Akashvani Mann Ki Baat programmme-a thuchah a sawiah Prime Minister chuan silhfen hluihlawn za-a pakhat pawh tling mang lo chauh chu thawmhnaw dang siam lehna atan hman a ni a ti a. India chu silhfen hluihlawn thehthang tam lamah khawvela 3-na a ni a ti.

Prime Minister chuan khawvel pumah hian silfen hlui hlamchhiah a, a thar lei hi kan intihhmuh tual tual a ti a. Hei hian silhfen hluihlawn a tipung zel a ni a ti. Hemi sutkianna tur hian India pawhin theihtawp chhuaha hma a lak a ngai a ni a ti. Sumdawnna bul tan tir tam takin hemi lam hi an buaipui tawh a ni a ti.

Prime Minister chuan kawr leh pheikhawk hluite chu chei that a, a mamawhte hnenah sem a ni a ti a. Thil chei mawina te, ip khai chi te, office mamawh hmanrua leh naute lem thlengin silfen hluihlawn siam danglam atanga siam chhuah mek zel a ni a ti bawk.

